



LEGE-AURREPROIEKTUA, EUSKADIKO ZIBERSEGURTASUN AGENTZIA SORTZEKOA

Zioen adierazpena.

Informazioaren eta komunikazioaren teknologien (IKT) garapenak gero eta mendekotasun handiagoa sortzen du teknologia horiekiko, gizartearen garapen ekonomikorako eta aurrerabiderako funtsezko elementu bihurtu baitira. Mendekotasun horrek ezinbesteko egiten du IKTak erabiltzeak dakartzan arriskuak identifikatzeko eta arintzeko mekanismoak zabaltzeko premia.

Digitalizazioa azkar doa aurrera, gizartearen zati handi batek har dezakeen abiaduratik gora. Horregatik da funtsezkoa enpresek eta herritarrek uler dezaten eta jabetu daitezen hiperkonektatuta eta etengabeko bilakaeran dagoen ingurune batean harremanak garatzeak dituen arriskuez. Bestalde, herritarrek administrazio publikoekin elektronikoki modu seguruan harremanetan jartzeko eskubidea dute, eta horrek azpiegitura digitalen funtzionamendu egokirako eta erresilientziarako beharrezko baldintzak emango dituen esparrua garatzea eskatzen du.

Komunikazio digitalen arteko erlazioak eta mendekotasunak, eta informazioak sarean duen esposizio-mailak, herritarren segurtasuna eta jarduera ekonomikoa bermatuko dituen babes-premia ezkutua dakarte. Horregatik, azpiegiturak eta komunikazio-zerbitzuak zibersegurtasunaren esparruko mehatxuetatik babestea oinarrizko zutabe bihurtu da hainbat sektore eta administrazioentzat azken aldi honetan.

Harreman pertsonalen eta transakzio ekonomikoen digitalizazio progresiboarekin areagotu egin dira ingurune digitalean gertatutako delituzko praktikak; beraz, delitu horiek hautemateko, ikertzeko eta pertsegitzeko beharrezkoak diren baliabideak indartu behar dira. Zentzu horretan, Ertzaintzak egindako kriminalitateari buruzko estatistikek informatika-delituen gorakada erregistratu dute azken urte hauetan, arau-hauste penalen guztizko kopuruak izan duen hazkundera baino handiagoa, hain zuzen. Horrela, bada, zibersegurtasuna bultzatzeko organismo publiko espezifiko bat sortzea tresna tekniko garrantzitsua izan daiteke sarearen bitartez egindako legez kanpoko jokabideen aurkako borrokan laguntzeko.

Euskal Autonomia Erkidegoko administrazio publikoak ez daude arrisku horietatik salbu, ez eta arrisku horien areagotzetik ere. Horrela bada, gaur egun jarduerak egiten dira Euskal Autonomia Erkidegoko administrazio publikoko mailetan zerbitzuak zibersegurtasun-arriskuetatik babesteko, batez ere Eusko Jaurlaritzari, foru-aldundiei eta toki-erakunde nagusiei informatika-zerbitzuak ematen dizkieten organismoetan. Era berean, hainbat plan eta akzio daude enpresa-sareari eta herritarrei euren buruak babesten laguntzeko, bai Euskal Autonomia Erkidego mailan, bai lurralde historikoetan, beren eskumenen barruan ekonomia garatzen eta sustatzen duten organoen bitartez.

Euskal Autonomia Erkidegoan zibersegurtasunaren esparruan diharduten organismoen artean, erreferentetzat jotzen da, gaur egun, Zibersegurtasun Euskal Zentroa (Basque Cybersecurity Centre edo BCSC). Zentroa Eusko Jaurlaritzak jarri zuen martxan, Euskadin zibersegurtasuna bultzatzeko zibersegurtasuna aplikatzearekin lotutako jarduera ekonomikoa dinamizatuz eta sektore hori sendotuz. 2017az geroztik,

Zibersegurtasun Euskal Zentroak arrakastaz sustatu eta garatu du zibersegurtasunaren kultura euskal gizartean. Haren lanari esker, zibersegurtasunaren aplikazioarekin lotutako jarduera ekonomikoa dinamizatu ahal izan da, sektore profesionala indartu, eta Euskadi zibersegurtasunaren alorrean interes-eskualde gisa kokatu nazioartean, industriaren esparruan bereziki. Euskal Autonomia Erkidegoan zibersegurtasunari buruzko heldutasun- eta kontzientziazio-maila handitzeko ekimenak gidatzen eta laguntzen ditu Zentroak, zibersegurtasun-gertakariei aurrea hartzeko eta horiei erantzuna emateko esparruan bildutako proiektuen (CERT, Computer Emergency Response Team) eta zibersegurtasuneko euskal ekosistema sustatzera bideratutako ekimenen bitartez. Hori guztia, enpresa-sektorearekin lankidetzan eta inbertsioa eta talentua erakartzeko xedez.

Gaur egungo ingurumarian eta dauden joerak kontuan hartuta, zibersegurtasuna zeharkako gai gisa hartu eta dinamizatu behar da Euskal Autonomia Erkidegoko zenbait organismoren ekimenen esparruan; ekimenen euskarri izan behar du behar bezala gara daitezzen, eta laguntza eman behar die herritarrei eta enpresa-sektoreari. Bada, testuinguru horretan sortu da Euskal Autonomia Erkidegoko sektore publikoan ekimen komun bat garatzeko premia, dauden baliabideen koordinazioa artikulatu eta indartuko duena, eta zibersegurtasunaren inguruko heldutasun-maila eta erresilientzia areagotzeko balioko duena Euskal Autonomia Erkidego osoan. Horrela, bada, oso garrantzitsua da Euskadiko zibersegurtasunaren organismo integratzaile eta zeharkako bat bultzatzea, Internet eta teknologia berrien erabileraren ondoriozko mehatxuen aurrean gizarteari segurtasuna eta egonkortasuna emango diona, eta kanpoko eragileekiko harremanetarako puntu bakarra izango dena.

Zibersegurtasunaren zeharkakotasunak eta garrantziak ezinbestekoa egiten dute informazioaren eta komunikazioaren arloan eskumena duten erakundeen arteko koordinazioa, baita segurtasun fisikoaren eta pertsonen arloko erakunde arduradunen artekoa ere. Era berean, koordinazio hori beste eskumen-esparru batzuetan (Estatuan, esate baterako) jarraitutako estrategiarekin eta Europar hartutako ekimenekin bat etorritzat behar da, interesa baitago zibersegurtasuna funtsezkotzat jo eta Europar Batasunaren helburu estrategikoak betetzeko.

Horrenbestez, lege honen xedea Euskadiko Zibersegurtasun Agentzia sortzea da (aurrerantzean, Agentzia), zuzenbide pribatuko erakunde publikoa, nortasun juridiko propioa duena, eta bere helburuak betetzeko gaitasun osoa. Horrela, bermatzen da Eusko Jaurlaritzak gaur egungo informazioaren gizartean sortzen diren zibersegurtasunaren arloko mehatxuei eta arriskuei aurre egiteko beharrezkoak diren tresnak eta baliabideak izango dituela.

Euskal Autonomia Erkidegoak bere Autonomia Estatutuan (abenduaren 18ko 3/1979 Lege Organikoaren bidez onartu zen) bereganatutako eskumenak baliatuz egin da honako araudi hau. 10.2 artikulua, esate baterako, autonomia-erkidegoaren esku uzten ditu hari dagozkion autogobernu-erakundeen antolaketa-, araubide- eta funtzionamendu-arloko eskumenak; 10.4 artikulua, toki-araubidearen arlokoak; 10.24 artikulua, Euskadiko berezko arlo publikokoari buruzkoak; eta, 10.25ak, berriz, Euskadiko jarduera ekonomikoen sustapen, garapen ekonomiko eta plangintzaren arlokoak, betiere ekonomiaren antolaketa orokorrarekin bat eginda.

Bestalde, Estatutuaren 17. artikulua ezarritakoaren arabera, Euskal Autonomia Erkidegoari dagokio segurtasun publikoaren arloko eskumena, bereziki polizia eta

herritarren segurtasunaren arloetakoak. Eskumen hori ulertu behar da beste eskumen batzuekin integratuta dagoela, hala nola larrialdien eta babes zibilaren arloko eskumenekin. Eskumen horiek guztiek segurtasun sistema orokor propioa osatzen dute, nahiz eta gai horien gaineko eskumenak dituzten beste administrazio batzuek ere parte hartzen duten.

Euskal Autonomia Erkidegoaren segurtasun publikoko eskumenak Euskadiko segurtasun publikoaren sistemaren plangintza- eta koordinazio-gaiak ere biltzen ditu. Eskumen-antolaketa horretako agintari eta organo autonomiko eskudunak Euskadiko Segurtasun Publikoaren Sistema Antolatzeko ekainaren 28ko 15/2012 Legean arautzen dira. Eskumen-antolaketa horren helburua da herritarrei era guztietako arriskuen aurrean babesa ematea eta eskubideak eta askatasunak modu askean eta baketsuan balia ditzaten bermatzea. Eta, kasu honetan, ahalegina eginez administrazio elektronikoaren segurtasuna bermaturik egon dadin autonomia-erkidegoko administrazio orokorrean eta gainerako euskal administrazio publikoen komunikazio-sare elektronikoetan, bai barrurako bai kanporako, alegia, gainerako erakunde publikoekiko eta administratuekiko harremanetarako.

Era berean, Euskal Autonomia Erkidegoko Sektore Publikoari buruzko maiatzaren 12ko 3/2022 Legean aurreikusitako prozedurari jarraituta sortu da Agentzia, Euskal Autonomia Erkidegoko sektore publikoaren antolaketaren eta funtzionamenduaren esparruan erreferentzia-testu gisa. Lege horren 39. artikuluan xedatutakoaren arabera, – zuzenbide pribatuko ente publikoak dira zerbitzu publikoak emateko edo kudeatzeko edo kontraprestazioren bat eska dezaketen interes publikoko ondasunak ekoizteko gomendioa duten Euskal Autonomia Erkidegoko izaera publikoko ente instituzionalak. Zuzenbide pribatuaren mende geratzen dira hirugarrenetikiko harremanetan eta beren jarduera garatzean. Hala ere, sortze-arauak ematen dizkien administrazio-ahalak baliatzean, administrazio-zuzenbideak arautuko ditu.

Legeak azalpen-zati bat dauka, hamahiru artikulua ditu orotara, hiru kapitulutan egituratuta, xedapen gehigarri bat, xedapen iragankor bat eta hiru azken xedapen.

Lehenengo kapituluan Euskadiko Zibersegurtasun Agentzia sortzea xedatzen da eta bere aplikazio-eremua, xedea eta eskumenak zehazten dira.

Bigarren kapituluan egitura organikoa eta Agentziaren organoen eginkizunak definitzen dira.

Hirugarren kapituluak langileen araubidea, ekonomia, finantza, ondarea eta kontratazioaren arloko araubidea ezartzen ditu.

Xedapen gehigarriak ezartzen du SPRI - Enpresa-garapenerako Euskal Agentzia zuzenbide pribatuko erakunde publikoak, Zibersegurtasun Euskal Zentroaren arduradun legez, Zentroari atxikitako aktibo material, langile eta baliabide batzuk lagako dizkiola Agentziari, Agentziak bere eginkizunak bete ditzan; bai eta Euskadiko Zibersegurtasun Agentziaren subrogazioa ere, SPRIk sinatutako kontratu eta hitzarmenetan.

Xedapen iragankorrak Zibersegurtasun Euskal Zentroaren eginkizunak betetzea arautzen du Agentzia eratu arte.

Azken xedapenetako lehenengoak eta bigarrenak ahalmena ematen diete Euskal Autonomia Erkidegoko dagozkien organoei behar diren aurrekontu-aldaketak egiteko eta lege hau erregelamendu bidez garatzeko.

Azken xedapenetako hirugarrenak legea noiz jarriko den indarrean xedatzen du, Euskal Herriko Agintaritzaren Aldizkarian argitaratu eta hurrengo egunean, hain zuzen.

I. KAPITULUA XEDAPEN OROKORRAK

1. artikulua. Sortzea, izaera eta araubide juridikoa.

1. Euskadiko Zibersegurtasun Agentzia - Agencia Vasca de Ciberseguridad sortu da. Euskal Autonomia Erkidegoko sektore publikoko zuzenbide pribatuko erakunde publikoa da, nortasun juridiko propioa duena eta bere jarduera ordenamendu juridiko pribatura egokitzen duena. Bere helburuak lortzeko jardute-gaitasun osoa du, autonomia organiko eta funtzionala du, eta segurtasunaren arloan eskumena duen sailera atxikita dago.

2. Agentziak Vitoria-Gasteizen izango du egoitza. Bere eginkizunak betetzeko, Agentziak ordezkaritzen laguntza izan dezake Euskadiko lurralde historiko bakoitzean.

3. Lege honek, zuzenbide pribatuko erakunde publikoei aplikatu dakizkiekeen lege-xedapenek eta bere estatutuek arautzen dute Agentzia. Estatutu horiek Eusko Jaurlaritzaren dekretu bidez onartuko dira, segurtasun arloan eskumenak dituen Eusko Jaurlaritzako sailak proposatuta.

4. Agentziaren jarduera, aplikatu beharreko zuzenbide zibileko, merkataritza-zuzenbideko eta lan-zuzenbideko arauetara egokitzen da kanpo-harremanetan, ahal publikoak baliatzea dakarten egintzetan izan ezik, egintza horiek administrazio-zuzenbidearen mende baitaude. Agentziak, atxikita dagoen sailarekiko harremanetan, administrazio-zuzenbidea bete beharko du. Hala egin beharko du, zehazki, kontua denean 2.2 artikuluko d), e), f), g), h), i), l), m), n), o), p) eta r) letretan agindu zaizkion eginkizunak betetzea Euskal sektore publikoari dagokionez.

5.- Euskadiko Zibersegurtasun Agentziaren ordezkaritza eta defentsa epaiketetan, Eusko Jaurlaritzaren Zerbitzu Juridikoaren esku egongo da, haren arau erregulatzailaetan xedatutakoaren arabera.

2. artikulua. Xedea eta eginkizunak.

1. Agentziaren xedea da zibersegurtasuna sustatzea eta koordinatzea Euskal Sektore Publikoaren maiatzaren 12ko 3/2022 Legeak mugatutako euskal sektore publikoan, haren eskumeneko informazio-sistemen segurtasunaren eta sare elektronikoen segurtasunaren esparruan; eta Euskal Autonomia Erkidegoa, bertako herritarrak eta enpresa-sarea zibersegurtasunean eta garapen digital seguruan treba daitezen babestea eta bultzatzea.

2. Xede hori betetzeko, Agentziari eginkizun hauek dagozkie:

- a) Euskadiko administrazio publiko guztientzat zibersegurtasun-estrategia bat sustatzea, eta administrazio horiek zibersegurtasunarekin lerroka daitezen bultzatzea eta koordinatzea.
- b) Euskal sektore publikoarentzat gomendagarriak diren segurtasun-estandar, -gidalerro eta -arau teknikoen esparrua bultzatzea.
- c) Euskal Autonomia Erkidegoko Administrazioak zibersegurtasunaren arloan izapidetutako arau-xedapenak egiteko prozeduretan nahitaezko txostenak egitea.
- d) Euskadiko sektore publikoaren esparruan hedatutako zibersegurtasun-gaietako politika publikoen urteko ebaluazioak egitea.
- e) Euskal Autonomia Erkidegoan zibersegurtasun-gertakariei aurrea hartzea, antzematea eta haiei erantzutea. Horretarako, irizpideak finkatuko dira, eta babes-neurri egokiak sustatuko dira ziberjazarpenari eta arriskuei aurre egiteko azpiegitura teknologikoetan, informazio-sistemetan, informazioaren eta komunikazioaren teknologien zerbitzuetan eta horiek tratatzen duten informazioaren eremuan. Hori guztia, aplikatu beharreko eskumen-esparrua errespetatuta.
- f) Euskal Autonomia Erkidegoko zerbitzu publikoak edo funtsezkoak kudeatzen dituzten entitateei buruzko datu egokiak biltzea informazioaren segurtasun-egoerari dagokionez, arreta berezia jarrita zerbitzu publikoen funtzionamendurako edo pertsonen segurtasunerako kritikoak diren sistemetan, Eusko Jaurlaritzari eta zerbitzu kritiko eta funtsezko horiek ematen esku hartzen duten lurraldeko administrazio publikoei horren berri emateko, eta neurri egokiak proposatzeko zibersegurtasunaren inguruko arriskuen kudeaketa eginez.
- g) Larrialdiei erantzuteko taldearen (CERT) eginkizunak betetzea Euskal Autonomia Erkidegoaren eskumenen barruan, eta Estatuko zein nazioarteko beste zibersegurtasun organismo batzuekin harremanetan egotea zibereraso bat gertatuz gero kalteak eta berreskuratze-denbora minimizatzeke.
- h) Agentziaren jardun-eremuan diharduten segurtasun informatikoko intzidentziei erantzuteko taldeak (CSIRT) eta larrialdiei erantzuteko taldeak edo entitate baliokideak koordinatzea, indarrean dagoen legeriarekin bat etorritik, eta Estatuko eta nazioarteko beste CSIRT batzuekin lankidetzan aritzeko ereduak ezarriz. Era berean, Agentziak alerta goiztiarreko eta segurtasun-mehatxuei, -ahultasunei eta -intzidentziei erantzuteko laguntza-eginkizunak beteko ditu euskal sektore publikoaren esparruan.
- i) Azpiegitura teknologikoen, informazio-sistemen eta informazioaren teknologien zerbitzuen gaineko ziberintzidentiek eta zibererasoak teknologikoki ikertzea eta aztertzea.
- j) Zibersegurtasunaren arloko hedapen, sustapen, prestakuntza eta kontzientziazioko jarduerak antolatzea.

- k) Zibersegurtasuneko neurri teknikoak proposatzea dauden baliabide informatikoak eta komunikazioak erabiltzerakoan, eta neurri horiei buruzko prestakuntza ematea Euskal Autonomia Erkidegoko Administrazioako langileei eta Agentziako langileei.
 - l) Eginkizun publikoak betetzeko eskumena duen edozein agintariri laguntzea zibersegurtasunaren inguruan eta, batez ere, legez kanpoko jokabideen aurkako borrokan, zuzeneko esku-hartzea eta proba elektronikoak lortzen laguntzea barne hartuta.
 - m) Euskal Autonomia Erkidegoko sektore publikoa koordinatzea dagozkion zibersegurtasun-planak egiten laguntzeko, baita plan horietan ezarritako helburuak lortzen ere.
 - n) Agentziaren zibersegurtasuneko zerbitzu materialak eta teknikoak Euskal Autonomia Erkidegoko sektore publikoaren esku jartzea.
 - o) Euskal Autonomia Erkidegoko sektore publikoaren koordinazioa bultzatzea, zibersegurtasun-planetan zehaztutako helburuak lortzeko beharrezkotzat jotzen den guztian. Horretarako, beharrezkotzat jotzen diren lankidetzak ezarriko dira.
 - p) Euskal Autonomia Erkidegoko sektore publikoaren ordezkari ofiziala izatea zibersegurtasunaren arloko nazioarteko, Estatuko eta eskualdeko organismoetan.
 - q) Zibersegurtasunaren eta garapen digital seguruaren arloko trebakuntza laguntzea eta bultzatzea enpresen esparruan eta Euskadiko funtsezko sektoreetan, hala nola osasuna, larrialdiak eta segurtasuna, gizarte zerbitzuak eta esku-hartze soziala, hezkuntza, garraioa, energia eta telekomunikazioak, edota sentikortzat jo daitekeen beste edozein sektoretan.
 - r) Indarrean dagoen legeriak ematen dion edo espresuki eskuordetzen edo esleitzen zaion beste edozein eskumen.
3. Bere xedea lortzeko, enpresa-sareari dagokionez, ekonomia sustapeneko eskumena duen Eusko Jaurlaritzako sailarekin koordinatuta beteko ditu bere eginkizunak Agentziak, eta beharrezkoa den lankidetzak ezarriko du Euskadin diharduten edo azpiegitura duten informazioaren gizaritearen eta komunikazio elektronikoetako zerbitzu-emaleekin, baita funtsezko sektoreekin ere.
4. Agentziak erakunde judizial eta polizialekin lankidetzan jardungo du, indarrean dagoen araudian ezarritakoaren arabera. Bere eginkizunak betetzerakoan, Agentziak polizia eta segurtasun publikoko kidegoekin koordinatu behar du, arlo horretan eskumena duen sailaren berezko eginkizunei kalterik egin gabe. Bereziki, laguntasuna eman eta koordinazioa erraztu, horixe egin behar du Agentziak, baldin eta hala eskatzen badiote polizia-kidegoek, poliziaren informazio-sistemen zibersegurtasunerako eta babeserako, kidego horiek arlo horretan aitortuta dituzten eskumenen arabera.
5. Agentziak lankidetzak ezarri behar ditu zibersegurtasunaren arloan foru-aldundiekin eta Euskadiko toki-erakundeekin.

II. KAPITULUA EGITURA ORGANIKOA

3. artikulua. Gobernu-organoak.

Administrazio Kontseilua eta Zuzendaritza Nagusia dira Agentziaren gobernu-organoak.

4. artikulua. Administrazio Kontseilua.

Administrazio Kontseilua Agentziaren kide anitzeko organo gorena da, eta hamasei kide hauez osatuta egongo da:

- a) Lehendakaria. Kargu hori segurtasunaren arloan eskumena duen sailburuak beteko du, eta kalitateko botoa izango du.
- b) Lehendakariordea. Kargu hori ekonomia-garapenaren arloan eskumena duen sailburuak beteko du.
- c) Segurtasunaren, gobernantza publikoaren eta ekonomia-garapenaren arloan eskumena duten sailtako kide bana. Kide horiek sail horietako sailburuorde kargua izan beharko dute.
- d) Foru-aldundi bakoitzeko kide bana. Aldundi bakoitzean, legez horretarako eskumena duen organoak izendatuko du, askatasunez.
- e) EAEko hiru lurralde historikoetako hiriburuetako udal bakoitzeko kide bana. Udal bakoitzean, legez horretarako eskumena duen organoak izendatuko du, askatasunez.
- f) Kide bat, EUDEL Euskadiko Udalen Elkartearen ordezkari gisa, elkarteak berak izendatuta.
- g) Kide bat, Eusko Jaurlaritzaren Informatika Elkarteko (EJIE) Gerentziaren titularra dena.
- h) Kide bat, Agentziaren zuzendari nagusia dena.
- i) Kide bat, Eusko Jaurlaritzan informazioaren eta komunikazioaren teknologien arloko eskumena duen zuzendaria dena.
- j) Idazkari bat. Hitza izango du, baina botorik ez, eta Agentziaren Administrazio Kontseiluak izendatuko du.

5. artikulua. Administrazio Kontseiluaren eginkizunak.

Hauek dira Administrazio Kontseiluari dagozkion eginkizunak:

- a) Agentziaren jardueren plan orokorrak onartzea.
- b) Agentziaren urteko aurrekontuaren aurreproiektua onartzea.
- c) Agentziaren jardueren urteko memoria onartzea.
- d) Aplikatzekoak diren legezko baldintzen arabera, plantillen eta bere langileen ordainsari-araubidearen proposamena egitea. Proposamen hori, betiere, Eusko Jaurlaritzak onartu beharko du.
- e) Agentziaren estatutuak eta haren antolaketari eta funtzionamenduari buruzko gainerako arauak onartzeko eta aldatzeko proposamena egitea, Eusko Jaurlaritzari helarazteko.
- f) Eusko Jaurlaritzaren onespina eskatzen duten beste erabaki-proposamen batzuk hari helarazteko proposatzea.
- g) Agentziaren jardunaren jarraipena, ikuskapena eta ebaluazioa egitea, eta, bereziki, Agentziako Zuzendaritzaren kudeaketa kontrolatzea eta Agentziari dagozkion erantzukizunak eskatzea.
- h) Beste erakunde edo pertsonifikazio juridiko batzuetan parte hartzeko baimena ematea. Aplikatu beharreko araudia bete beharko du, eta kasuan kasu Euskadiko Zibersegurtasun Agentziari dagozkion eskubideak egikaritzeko ditu.
- i) Bidezko diren hitzarmen, akordio, protokolo edo ekintzak onartzea.
- j) Bere jardueraren berri ematea Eusko Jaurlaritzari, aldian-aldian.
- k) Legeek edo Agentziaren Estatutuek ematen dizkioten gainerako eginkizunak betetzea, bai eta, Agentziarenak izan arren, Agentziaren beste organo bati esleitu ez zaizkion gainerakoak ere.

6. artikulua. Zuzendaritza Nagusia.

1. Agentziako Zuzendaritza Nagusia Eusko Jaurlaritzak izendatuko du, bere kasa*; baina proposamena Administrazio Kontseiluko Lehendakariak egingo du.
2. Agentziaren Zuzendaritza Nagusia pertsona bakarrekoa izango da. Izendatutako pertsonak Eusko Jaurlaritzako sailburuorde kargua izan beharko du.
3. Zuzendariaren eginkizunak honako hauek dira:
 - a) Agentziaren eta bere langileen zuzendaritza arrunta.
 - b) Administrazio Kontseiluaren erabakiak proposatzea eta egikaritzea.
 - c) Agentziaren ordezkari arrunta.

- d) Bidezko diren hitzarmen, akordio, protokolo edo ekintzak formalizatzea Agentziaren izenean.
- e) Kontratazioak egitea Agentziaren izenean, bai eta gastuen erabilera baimentzea eta ordainketak agintzea ere, indarrean dagoen legerian ezarritakoaren arabera.
- f) Administrazio Kontseiluari aurkeztea Agentziaren jarduera-plangintzaren nondik norako nagusiak, plan zuzentzailearen eta urteroko planen nondik norako nagusiak, emaitzak ebaluatzeko proposamena, eta urteroko ebaluaketa-agiria, Euskal Sektore Publikoaren Legeko 52. artikuluan arautua (3/2022 Legea, maiatzaren 12koa).
- g) Administrazio Kontseiluari honakoak proposatzea: Agentziaren urteko aurrekontuaren aurreproiektua, plantillak eta horien ordainsari-araubidea, bai eta urteko memoria ere.
- h) Agentziako Administrazio Kontseiluak edo estatutuek agintzen ditoten beste edozein eginkizun.

7. artikulua. Aholku Kontseilua.

1. Agentziak Aholku Kontseilua izango du. Agentziaren zuzendaria izango da Kontseilu horren buru eta kide hauez osatua egongo da:

- a) Hezkuntza eta osasun arloko eskumenak dituzten sailtako ordezkari bana, sailtako titularrek izendatuak.
- b) Unibertsitatearen eta ebaluazioaren esparruan zibersegurtasun-gaietan prestigio aitortua duen aditu bat, Euskal Autonomia Erkidegoan egoitza duten unibertsitateek izendatua, txandaka.
- c) Teknologiaren esparruan prestigio aitortua duen aditu bat, BRTA Teknologia Zentroen Aliantzak izendatua, txandaka.
- d) CYBASQUE, Euskadiko Zibersegurtasun Industriak biltzen dituen enpresaburuen elkarteak izendatutako kide bat.
- e) Datuak Babesteko Euskal Agintaritzako zuzendari nagusia.
- f) Informatika-delituetan eskumena duen Ertzaintzaren Dibisioko burua.
- g) Ziurtapen eta Zerbitzu Enpresa, Izenpe SAren Administrazio Kontseiluko lehendakaria.
- h) SPRI–Enpresa-garapenerako euskal agentziaren zuzendari nagusia.
- i) Zibersegurtasunaren esparruan nazioartean proiektzioa eta prestigio aitortua duten bi pertsona ospetsu, Administrazio Kontseiluak proposatuta.

2. Aholku Kontseiluaren eginkizunak dira:

- a) Agentziaren gobernu-organoei aholkularitza ematea.
- b) Agentziaren gobernu-organoeek eskatzen dizkioten gai guztiei buruzko txostenak egitea. Agentziaren eskumeneko gaiekin zerikusia duten gaiei buruzko proposamenak ere egin ahal izango ditu.

3. Aholku Kontseiluak berak onartuko ditu bere antolaketako eta funtzionamenduko arauak. Lehendakari-kargua eta idazkari-kargua egongo dira arau horietan aurreikusita, eta nola aukeratu edo izendatu behar diren ere bai.

4. Ahal dela, Aholku Kontseiluaren osaera orekatua izango da emakumeen eta gizonen artean, eta trebakuntza, gaitasun eta prestakuntza egokia izango dute. Ondorio horietarako, ordezkari-tza orekatutzat joko da sexu biek gutxienez %40ko ordezkari-tza dutenean.

5. Aholku Kontseiluaren kide hautetsiak izendatzerakoan, kontuan hartuko da Euskal Autonomia Erkidegoko bi hizkuntza ofizialetan behar besteko hizkuntza-gaitasuna izatea.

8. artikulua. Gobernu-organoen ebazpenen aurkako errekurtsioak.

Agentziaren Zuzendaritzak eta Administrazio Kontseiluak bere eginkizun publikoak betetzeko emandako ebazpenen aurka, administrazioarekiko auzi-errekurtsioa jarri ahal izango da. Aldez aurretik, berraztertze-errekurtsioa jarri ahal izango da, nahi izanez gero.

9. artikulua. Estatutuak.

Agentziaren estatutuak Eusko Jaurlaritzak onartu behar ditu, dekretu bidez. Han zehaztuko eta arautuko dira gobernu-organoen eginkizunak, Administrazio Kontseiluaren funtzionamendua, Agentziaren barruko egitura organikoa eta funtzionamendu-erregimena, bai eta Euskal Sektore Publikoaren Legeko 44.3 artikuluan jorratzen diren gainerako edukiak ere (3/2022 Legea, maiatzaren 12koa).

III. KAPITULUA

LANGILEEN ARAUBIDEA, EKONOMIA, FINANTZA, ONDAREA ETA KONTRATAZIOAREN ARLOKO ARAUBIDEA

10. artikulua. Agentziako langileak.

1. Agentziak bere langileak bere kabuz kontratatzeko, kudeatzeko eta prestatzeko ardura dauka.

2. Hauek dira Agentziako langileak:

- a) Agentziako bertako langileak, lan-zuzenbidearen arabera kontratatutakoak, berdintasun-, merezimendu- eta gaitasun-printzipioak errespetatuz.
- b) Euskal Autonomia Erkidegoko administrazio publikoko langileak. Ahal publikoak erabiltzea dakarten lanpostuak funtzionarioentzat gorderik egongo dira, eta langile horiei Euskal Autonomia Erkidegoko Administrazioaren funtzio publikoa arautzen duen araudia aplikatuko zaie.

11. artikulua. Ekonomia, finantza eta ondarearen arloko araubidea.

1. Agentziak finantza-autonomia du, Euskal Autonomia Erkidegoko Administrazioaren finantzei buruzko araudiak ezarritakoa.

2. Agentziak aurrekontuaren aurre-proiektua egin eta onartu beharko du urtero. Horren ondoren, Eusko Jaurlaritzara bidali beharko du, haiek onetsi aurretik, Autonomia Erkidegoko aurrekontu orokorretan sar dezaten, behar bezain ondo bereizita, Euskal Autonomia Erkidegoko aurrekontu-araubidea arautzen duten legeek ezarritakoarekin bat etorrira.

3. 1.– Euskadiko Zibersegurtasun Agentziaren ondarea Euskadiko ondarean sartzen da. Izan ere, titular gisa dagozkion ondasun eta eskubideen multzoak osatzen du erakundearen ondarea, Euskadiko ondareari buruzko Legearen testu bateginean (azaroaren 6ko 2/2007 Legegintzako Dekretuak onetsia) ezarritakoarekin bat etorritz.

Euskadiko Zibersegurtasun Agentzia zuzenbide pribatuko erakunde publikoa da. Ondasun eta eskubide batzuen titularra da, beste batzuk baditu atxikita, eta haien guztien eskuduna ere bada, Euskadiko ondareari buruzko Legearen testu bateginean ezarritakoarekin bat etorritz.

Atxikita dituen ondasun eta eskubideen gainean jarraipena egingo da, ondare-kontabilitatearen bitartez. Era berean, beharrezkoa baldin bada, Euskadiko Ondareko Ondasun eta Eskubideen Inbentario Orokorra egiten ere lagunduko du.

4. Hauek dira Agentziaren baliabideak:

- a) Haren ondareko produktuak eta errentak edo hari atxikita dauden ondasunak edo administratzen eta ustiatzen dituenak.
- b) Euskal Autonomia Erkidegoaren Aurrekontu Orokorretan urtero esleitzen zaizkion diru-izendapenak eta transferentziak.
- c) Indarren dagoen legerian aurreikusitakoarekin bat etorritz, jasotzea egokituko litzaizkiokeen diru-sarrerak, eta beraren jardueren ondorioz sortzen direnak.
- d) Legeen arabera dohaintza edo oinordetza-titulu bidez jaso ditzakeen dirulaguntzak, ekarpenak eta baliabide ekonomikoak.
- e) Lege- edo erregelamendu-xedapenen arabera dagokion beste edozein baliabide.

5. Kontrol ekonomikoa, berriz, ekonomia-, finantza- eta kudeaketa-kontrol etengabearen modalitatean egingo da, Euskal Autonomia Erkidegoko Ekonomia Kontrolari eta Kontabilitateari buruzko Legearen testu bateginean ezarritakoaren arabera (urriaren 19ko 2/2017 Legegintzako Dekretuaren bidez onartu zen), baina Herri Kontuen Euskal Epaitegiari dagokionetik ezer kendu gabe.

6. Agentziak jardueren memoria onartuko du urtero. Memoria hori, Eusko Jaurlaritzari eta Legebiltzarrari helaraziko dio, eta Agentziaren zuzendariak segurtasun arloan eskumena duen Eusko Legebiltzarreko Batzordeari aurkeztuko dio.

12. artikulua. Kontratazio-araubidea.

1. Agentziaren kontratazioa kontratazio publikoaren arloko legeriak eta hura garatzeko araudiak arautzen dute.

2. Zuzendaritza Nagusia da Agentziaren kontratazio-organoa.

13. artikulua. Suntsitzea eta desegitea.

1. Aplika daitekeen legedian ezarrita dauden prozedura eta baldintzak betez egingo da Agentziaren suntsitzea eta kitapena.

2. Agentziaren suntsitze edo desegite kasuan, urtean urteko Euskal Autonomia Erkidegoko Aurrekontu Orokorren Legean ezarritako baldintzetan integratuko dira langileak.

XEDAPEN GEHIGARRIA. Aktibo materialak eta langileak Agentziari lagatzea eta kontratu eta hitzarmenetan subrogatzea.

1. SPRI-Enpresen Garapenerako Euskal Agentzia zuzenbide pribatuko erakunde publikoa da. Bada orobat Basque Cybersecurity Centre - Zibersegurtasunaren Euskal Zentroaren arduraduna, eta hala den aldetik, Euskadiko Zibersegurtasun Agentziari lagatzen dizkio -hark errazago bete ditzan agindu zaizkion eginkizunak- Euskadiko Ondareari buruzko Legearen testu bategina onartzen duen Legegintzako Dekretuaren 6.2 artikuluan aipatzen diren aktibo materialak (2/2007 Legegintzako Dekretua, azaroaren 6koa), eta zentroari esleitutako langileak eta baliabideak. Legezko ordezkariak daukanari dagokio aktibo material horiek doan eskuratze hori onartzea.

Lagapen hori gauzatzeko, lege hau onartu ondoren, Zentroak beharrezkoak diren barne-izapideak egin beharko ditu, eta Euskal Autonomia Erkidegoko Administrazioak beharrezkoak diren administrazio-eta aurrekontu-aldaketak egin beharko ditu.

2. Euskadiko Zibersegurtasun Agentzia SPRI- Enpresa-garapenerako Euskal Agentziak izenpetutako kontratu eta hitzarmenetan subrogatzen da, baita zibersegurtasunaren esparruan parte hartzen duen Estatuko eta nazioarteko organismoetako ordezkarietan ere, betiere kontratazio publikorako araudian ezartzen dena betez.

3. Euskadiko Zibersegurtasun Agentzia Euskal Autonomia Erkidegoaren eta bere sektore publikoko entitateen posizio juridikoan subrogatzen da, Agentziak bere gain hartzen dituen eginkizunen esparruan dagozkion eskubide eta betebeharrei dagokionez, eta hori Agentziaren Estatutuak onartzeko dekretuan zehaztu beharko da.

XEDAPEN IRAGANKORRA. Zibersegurtasun Euskal Zentroaren eginkizunak betetzea Agentzia eratu arte.

1. SPRI- Enpresa-garapenerako Euskal Agentzia zuzenbide pribatuko erakunde publikoak, Zibersegurtasun Euskal Zentroaren arduradun legez, bere eginkizunak betetzen jarraitu behar du baliabide tekniko eta pertsonalen eta aktibo propioen bidez, harik eta Agentzia benetan eratu eta martxan jartzen den arte.

2. Agentzia eratzen den unean SPRIren Zibersegurtasun Euskal Zentroan zerbitzuak ematen ari diren langile lan-kontratudunak Agentzian sartu ahal izango dira, dagokion lan-araudian ezarritakoaren arabera.

AZKEN XEDAPENETAKO LEHENENGOA. Agentzia eratzea.

1. Agentzia abian jartzeko eta jarduerak hasteko data Agentziaren estatutuak onartzen dituen dekretuan ezartzen dena izango da, eta betiere lege hau indarrean jartzen denetik urtebete pasa baino lehen.

2. Jardueren hasiera eta dagokion Aurrekontuen Legea indarrean sartzea batera gertatzen ez badira, Eusko Jaurlaritzak Agentziaren aurrekontua onartuko du, eta horrekin batera Agentziaren jarduerak hasten diren ekonomia-ekitaldiko aurreikuspeneko urteko kontuak aurkeztuko ditu, eta horren berri emango dio Eusko Legebiltzarreko Ekonomia, Ogasun eta Aurrekontu Batzordeari, hamabost eguneko epean. Horretarako, aurrekontuen arloan eskumena duen sailari baimena ematen zaio aurrekontu hori osatzeko beharrezkoak diren aurrekontu-aldaketak egiteko, baina aldaketa horiek ezin dute handitu erakunde publikoaren jardueren hasieran indarrean zeuden Aurrekontu Orokorretako partidetan izendaturiko zenbateko globala.

AZKEN XEDAPENETAKO BIGARRENA. Baimenak.

Baimena ematen zaio Gobernuari xedapen gehigarrian aipatutako baliabideak Agentziara eskualdatzeko beharrezkoak diren aurrekontu- eta ondare-aldaketak egiteko.

AZKEN XEDAPENETAKO HIRUGARRENA. Indarrean jartzea.

Lege hau Euskal Herriko Agintaritzaren Aldizkarian argitaratu eta hurrengo egunean jarriko da indarrean.

Gobernu Kontseilura bidali, han onarpena eman diezaioten

Vitoria-Gasteiz, sinadura elektronikoan agertzen den egunean.
Josu Iñaki Erkoreka Gervasio

LEHEN LEHENDAKARIORDEA ETA SEGURTASUNeko SAILBURUA

BORRADOR